

KALATE PAUL A NGA TILI

BOTE YA EFESUS

Mebatan

(M.M. 18 : 19-21; 19; 20 : 17)

1 1 Ma Paul, nlômane Krist Yésus amu nkômbane Zambe, m'atili mimfufub mi [to'o Efésus] a bebuni be ne e be Krist Yésus. 2 Mvam é bo'o e be mia a mvo'é, bi so'o e be Zambe Esaa wongan a e be Nti Yésus Krist.

Bibotan bi nsisim e be Krist

(Rôm 8 : 15-17, 28-30; Gal 3 : 13, 14; 2 Tés 2 : 13, 14; 2 Tim 1 : 9,10; 1 Pét 1 : 1, 2)

3 Ebotan e bo'o e be Zambe a Esaa Nti wongan Yésus Krist ! nyô a nga botane bia a ébotane nsisim ése e mevôm ya yôb e be Krist, 4 aval ane a nga tobe bia mfa'a wé ôsusua mbôka'a ya si nyô, nde ete bi aye bo mimfufub a teke bijô asu dé e nye'an été. 5 a nga taté tyi'i na bi ne bone bé émien amu Yésus krist, aval ane mbôndane fe'e ye nkômbane wé ; 6 mfa'a ya ékaña'a a дума ya mvame jé, nje a nga mvamane bia e be Nyô a nye'e. 7 E be nyô bi nto nkôtan amu metyi mé, njamane minkômbane miangan, aval ane akum ya mvame jé, 8 nje a nga nguni mfa'a wongan a fe'e ése a ñyemane mam. 9 Ane a nga kulane bia ndimba nkômbane jé, aval ane mbôndane fe'e a nga bôndé e be nye na, 10 éyoñ biyoñ bi aye kpwaan, nde a ye late biôm bise nlô wua e be Krist, biôm bi ne e yôb été, a bi bi ne e si nyô e be nye. 11 E be nyô bi nga nyoñe ngab, a nga taté telé aval ane ntyi'ane ya nyô a nga kome mam mese aval ane ôyili ya nkômbane wé; 12 nde bi ne nyiñ mfa'a ya ékaña'a ya дума dé, bia bi nga taté tabe Krist ndi. 13 A nnye ate mia fe, éyoñ mi nga wô'ô benya mejôô, mbamba foé ya nyiane wônane, mi nga buni fe nye, mi nga feteban a mfufub nsisim ya ngaka'a, 14 nyô a ne mbômô ya ngabe jangan akekui nkôtane ya éli'i Zambe, mfa'a ya ékaña'a a дума dé.

Meye'elan Me Paul

(Ef 2 : 1-7; Fil 2 : 9-11; 3 : 10; Kol 1 : 3-6, 18, 19; 1 Pét 1 : 3, 4)

15 Amu ajô ete nde ma fe vôm me nga wô'ôtan mbunane wônane mi abuni Nti Yésus, a nye'an mi bili mfa'a mimfufub mise, 16 me ne te jô'é ve akéva amu ajô denan, éyoñ m'asimesane mia e meye'elane mam été, 17 nde

Rev. Matthias MEYE
Secrétaire Général 1961.....

Zambe Nti wongan Yésus Krist, Esaa a ne дума, a ye ve mia nsisime fek a nkulane mam ya ñyemane wé, 18 vôm a nga kuui mia mise me nlem ne ngeñ ane mi aye yeme jôm ndinlem ya nloene wé é né, jôm akum ya дума ya éli'i jé e be mia mimfufub mié, e né, 19 jôm beta éwôlô a ne te ave'e ya ngule jé mfa'a wongan, bia bebuni, e né, aval ane mboan ngule ésaé ya éwôlô jé ô né, 20 ñwô a nga bo e be krist, éyoñ a nga wômôlô nye akôlô miñwuan, a tooé nye mbonnôme wé e mevôm ya yôb été, 21 mbetane yôb a dañ éjôé ése, a ngulenjôan a ngul, a ati, a jôé ése é ne ñyôlan, sa ve e miaé wuna étam, ve nalé fe e wu w'azu. 22 Ane a nga télé biôm bise e mebo mé si, a nga bo nye nlô ya biôm bise mfa'a ya kirké, 23 nje é ne nyôle jé, njalan ya nyô a jalé biôm bisese'e ya été.

Akôlô Awu Akui Enyiñ

(2 Kor 5: 17; Ef 1 : 19, 20; Kol 2 : 12, 13; 3 : 1-3; Tit 3 : 3-8)

2 1 A mia bete a nga ve ényiñ, éyoñ mi mbe miñwuan amu minkobane mienan a mam abé menan, 2 mbie bite mi nga wulu été melu mvus, aval ane dulu ya si ndône nyô e né, aval ane njôô ya ngulenjôan ya ñyem a né, nyô nsisim w'abo ésaé éyoñe ji e be bon be ne melo. 3 E be be, bia bese bi nga too melu mvus a minkômban ya minsône miangan été, bi bo'o ve minkômbane ya minsôn a minsimesan, a bi mbe bone ya ayaa amu abialé, avale fe ane ba bevok. 4 Ve Zambe, nyô a ne abui nkoan éngôngo, amu beta nye'ane wé a nga nye'e bia, 5 ja'an éyoñ bi mbe miñwuan amu minkobane miangan, a nga ve bia ényiñ fufulu a Krist —mi nga nyiiban a mvam— 6 Ane a nga wômôlô fe bia fufulu a nye, a tooé bia fufulu a nye e mevôm ya yôb, e be Krist Yésus; 7 nde ete e miaé mi azu a ye liti beta akum ya mvame jé, nje a mvamane bia e be Krist Yésus. 8 Amu mi nga nyiiban a mvam amu mbunan, a jam ete e nji so e be miabebien, e ne mveane Zambe; 9 sa di d'aso e mimboan, amu môt a za wumu émien. 10 Amu bi ne mboane wé, ntéan e be Krist Yésus, ane bi aye bo mbamba mimboan, mmie Zambe a nga taté kôme na, bi wulu mie été.

Môte Wua E Be Krist

(Gal 3:28, 29; Kol 1:20-22; 2:13, 14; Behéb 10:19-22)

11 Jam ete nde simesa'ane na, mia mi nga too e melu mvus bikule ya minsôn, mi loba'ane na Be te ntyi'an atyele e be ba b'alobane na Bentyi'an atyele, amu jame ya minsôn e nga boban a mo, 12 mi nga too éyoñ éte Krist momo, nkandan mfa'a éjôé ya Israél, a bejin mfa'a bilat ya ngaka'a, teke'e ndinlem a teke'e Zambe e si nyô. 13 Ve éyoñe ji e be Krist Yésus, mia mi nga too ôyab melu mvus, mi nto bébé amu metyi me Krist.

14 Amu émien a ne mvo'é jangan, nyô a nga bo biôm bibaé jôme jia, a tyameya fe ésu ya zañ é nga bo é kand'é bia, ji ya ziñ amu minsône mié, 15 a nga te'elane metiñe ya memvinda a minjôan, nde ete a ne té, mfa'a wé émien, mfefé mô't éjiane ya bebaé, vôm ate a nga late bebaé be bo mvo'é; 16 nde fe a tooé be bebaane e be Zambe e nyôle jia été amu krôa, vôm a nga wôé ziñ éte a je. 17 Ane a nga zu a kate mia mbamba foé ya mvo'é, mia mi mbe ôyab; a mbamba foé ya mvo'é e be ba be mbe bébé; 18 amu bia bebaane bi mbili anyiine dangan e be Esaa amu nye, e Nsisim wua été. 19 Nalé ate nde mi nji beta bo bejin a mintabe, ve mi ne beébe bemie nlame, mimfufub, a ba ya nda bôte Zambe, 20 amu mi nga lôñeban e mbôka'a minlôman a bekulumejô yôb, Krist Yésus émien a too ako'o ya abuk. 21 E be nye nlôñan ôse, nlatan w'alat wua a wu mbok, w'ayaé akui w'abo mfufube tempel e be Nti. 22 E be nye ate, mia fe mi alôñeban mfula'ane akekui mi aye bo étaba'a Zambe e Nsisim été.

Esaé Mvolane Paul E Be Biku

(Rôm 16:25, 26; Ef 1:9, 10; Kol 1:24-29; I Pét 1:10-12)

3 1 Amu jam ete ma Paul, mbô'ô Krist Yésus amu ajô denan mia Biku— 2 Nge e ne nalé na, mi nga wô'ô foé ya éto mba'ale mam ya mvame Zambe, nje é nga veban e be ma mfa'a wônán, 3 ane ndimba jam é nga litiban e be ma aval ane me nga tili mia de a mejô tyôtyoé. 4 Eyoñ mi aye lañe jam ete, mi aye bo ngule ya yemelan aka'a ñyeman me bili e ndimba jame Krist éte, 5 nje éte é nji litiban e bo bone be bôt ya miaé mife, aval ane é nga litiban éyoñe ji e be mimfub minlômane mié a bekulumejô e Nsisim été; 6 e ne na, Bikul bi nto beébe bone be élik, a beébe bibu'a ya nyôl jijia, a beébe benyoñ ngabe ya ngaka'a, e be Krist Yésus amu mbamba foé. 7 Nnye ate me nga boban mvolô bisaé aval ane mveane ya mvame Zambe é né, nje é nga veban e be ma, ane mboan ésaé ya ngule jé. 8 Mvam éte é nga veban e be ma, mô't a dañe mimfufub mise e tyôtyoé, na, me kate Bikul mbamba foé ya akume Krist e ne te ayemelan; 9 ane bôte bese b'aye yen jôme fe'e ya ndimba é né, nje é nga solô e miaé ya kôa e be Zambe nnye a nga té biôm bise; 10 nde ete fe'e Zambe é ne bisu bisu é ne litiban éyoñe ji e be bejôô a be biwôlô bi ne mevôm ya yôb été amu kirke. 11 Ntyi'an ôte ya nnôm éto ô nga sondô boban e be Krist Yésus Nti wongan, 12 e be nye bi bili ayo'o nlem a ndinlem ya anyiine dangan amu mbunan bi abuni nye. 13 Jam ete nde m'aja'é na, mi bo te kat amu njiban m'ajibi nju'u amu ajô denan, amu nalé a ne duma denan.

Nyeman Nye'ane Krist

(Kol 2:1-3, 9, 10; 2 Pét 3:18; Yuda 24,25; Nkul 1:6)

14 Amu jam ete nde m'akute meboñe si asu Tate, 15 nyô nda bôt ése ya yôb a si nyô j'ayôban, 16 na, aval ane akume ya duma dé e né, a ne yemete mia a ngule Nsisime wé e be mô't ya été, 17 a ane Krist a ne tabe e minlem mienan été amu mbunan, éyoñ mi nto mbemane mindi a ntelan ngul e nye'an été, 18 ane mi aye tu'a bo ngul ya yem,

Rev. Matthias MEYE
Secrétaire Général 1961

mia be mimfufub mise, jôm ndam a nté a nkôñ a édok bi né, 19 a na, mi yeme fe nye'ane Krist, ñwô w'adañ ñyeman ôse, ane mi aye jaé akekui njalane Zambe ôse.

20 Nde e be nyô a ne ngul ya bo ésaé e be bia mboane w'adañe mam mese bi aja'é nge simesan, 21 e be nye дума e bo'o e kirke été a e be Krist Yésus akekui miaé mise ya nnôm éto a nnôm éto. Amen.

Mfula'ane Jôme Jijia Ya Nyô

(Rôm 12:4-8; I Kor 12:4-31; Kol 3:12-14)

4 1 Ajô ete, ma mbô'ô Nti, m'aye'elane mia na, wula'an ane d'ayiane nloen mi nga lobane wô 2 a nsuane nleme si ôse, a nje'eban, a ñwuane nlem, miabebien mi jiba'an e nye'an été; 3 mi to mban ya ba'ale mfula'ane jôme jia ya Nsisim e nlatane ya mvo'é été. 4 Nyôl é ne jijia, Nsisime ke wuwua, avale fe ane mi nga loban e ndinleme jia ya nloene wônan, 5 Nti wua, mbunane wua, mbaptizô wua, 6 Zambe wua, Esaa bia bese, nyô a jô bese yôb, a somesan e be bese, a too e be bese.

7 Ve mvam é nga veban e be mô t ase ya be bia aval ane abim ôve'e mveane Krist ô né. 8 Jame ete nde a jô na,

“Eyoñ a nga bet e yôb été, a nga kee nkunda minkôm,

A nga ve bôt mimvean. “

9 Nde mbetan a nga bet ô ne jé, ve na, a nga sise fe akui mefôla me ne mfa'a ya si, e si nyô ? 10 Nyô a nga sis a ne fe nyô a nga bet a dañe yôb ese, nde a ye jalé mam mese. 11 Nnye ate fe a nga télé bôte béziñe na, be bo minlôman; a bevok, bekulumejô; a bevok, bekate mbamba foé; a bevok, bepastô a beye'ele; 12 mfa'a ya kômôto minfufub na mi bo ésaé mvolan a ji ya nlôñane nyôle Krist, 13 akekui éyoñ bia bese bi aye bo nlatane jôme jia ya mbunan a ñyeman ya yeme Mone Zambe, akui ôkala nya môto, akui abime nté ya njalane Krist ; 14 ane bi aye bo te fe beta bo ayôme bongô d'atindiban e li a li a évuñulu ése ya ñye'elan, zen ya mefe'e me bôt, a atyeñe medu'ane mab été. 15 Ve na, vôm bi akobô benya mejô e nye'an été, bi yaé mezene mese mfa'a ya be nyô a ne Nlô, e ne na, Krist, 16 e be nye ngume nyôl ô ne ntimban a nlatan amu jua ese e wô'ô ve ngule jé, avale fe ane ébu'a ése j'abo abim ésaé j'ayiane bo, nde nyôl ébien j'aye yaé mfa'a ya lôñ ébien e nye'an été.

Nnôm Enyiñ A Mfefé

(Gal 5 :16-23 ; Kol 3 :1-13 ; I Yô 3:16-18; 4:7-11)

Rev. Matthias MEYE
Secrétaire Général 1961.....

17 Ajô ete m'ajô jame dina a yemete de e be Nti na, mi bo te beta wulu aval ane Bikul bi awulu, e ndundumbane ya minlem miab, 18 vôm nsimesane wob ô nto bidi, be nto fe nkandan a ényîñ Zambe amu ndiman ô ne e be be; amu minlem miab mi nga bo ayet; 19 be maneya bo nyôl ne kô'ôté, a ve bebien mfa'a ya mbia bisôk, avôl ya bo jam ese e ne mvin. 20 Mi nji ye'é Krist nalé ! 21 nge e ne fo'o na mi nga wô'ô ajô dé, a ye'é e be nye, aval ane benya mejôô me ne e be Yésus. 22 Mi findi nnôme mô't mfa'a ya aval ntaban mi nga too nnômô ényoñ, ñwô ô wuya ntuk amu mbia minkômban ya medu'an, 23 a na mi boban mimfefé e nsisim ya minlem mienan, 24 mi jaé mfefé mô't, ñwô ô nga téban éfunane Zambe mfa'a ya nya zôsôô a mfuban ntaban.

Metiñ Ya Mfefé Enyiñ

25 Jam ete nde, finda'ane minsos, a kobô benya mejôô, mô't ase baa ébemô'tô : amu bi ne bibu'a , mô't ase ébu'a nyô mbok. 26 Mi ya'a, ve te boan abé. Jôb e bô'ô te dim, aya'a denan e too. 27 Nalé fe, te veane diable akalan. 28 Nwuwub ô bo'o te beta wub, ve a bo'o nya ésaé, a bo mbamba ésaé a mo mé émien, nde a ne bi jôm éziñ ya ve ba be ne ôsame. 29 Ebole nkobô éziñ é bo'o te kui anyu denan, ve wu ô ne mvaé ane d'ayian mfa'a ya kômô'tô bôt, aval nkobô d'aye kalan mvam e be ba b'awô'ô wô 30 Nde, te vean Mfufub Nsisim Zambe ôlun e nlem, nnye mi nga feteban a nye akekui mô's nkôtan. 31 Ayôl ese, a ñwô'an ôlun, a ayaa, a miñyôn, a zok, bi vas e be mia, a fulan mbia nlem ase ; 32 mi bo'an mvam zañe jenan a wô'an éngôngo ; mi jama'an, aval ane Zambe a nga jamé mia e be Krist.

5 1 Ajô ete, bo'ane bevu Zambe ane bon a nye'e, 2 a wulu e nye'an été, aval ane Krist a nge nye'e bia a juu émien amu ajô dangan, a too mveane mbamba menyum a metuna'a e be Zambe. 3 Ve mejian, a mvin, nge mboane minyamete, bi bo'o te totebane jôé e zañ mimfufub. 4 Ja'ana jam éziñ e ne ôson, nge akut nkobô, nge mbia fianga, mbie bi ne te yian; ve mi viane'e vean akéva. 5 Amu mi atu'a yeme jame dina na, nke mangan ase, nge mvimvine mô't, nge mô'ta minyamete, nyô a ne nkañe biyeyeyeyña bi biôm, a nji bi ngab éjôé Krist baa Zambe été.

Wula'an Ane Bone Ya Efufub

(Rôm 13:11-14; I Kor 6:9-11; Kol 3:5-7; I Pét 2:9-12; I Yôh 1:5-7)

6 Mô't a bo'o te du'u mia a bivôvôla mejô : amu na, ayaa Zambe d'azu e be bone be ne melo amu mam mete. 7 Ajô ete, te boane benyoñ ngab mia be be. 8 Amu melu mvus mi mbe dibi été, ve éyoñe ji mi ne éfufub e be Nti. Wula'an ane bone ya éfufub 9 — amu ébuma ya afup j'alitiban e jam ese e ne mvaé, a zôsôô, a benya mejôô; 10 mi yemela'ane jam Nti a yen mvaé. 11 Mi bo'o te bo benyoñ ngab e minkôkôm mimboan ya dibi, ve mi viane'e kulane mie; 12 amu ntotan ya tote mam b'abo e mesoé ô ne fe ôson. 13 Ve mam mese me ne nkulan éfufub été m'ayené ne ngeñ : amu jôm ése j'aliti mam ne ngeñ é ne éfufub. 14 Jam été nde a jô na,

Ve'e ôyo, A nke ôyo,

ô kôlô e miñwuan,

A Krist a ye faé wo éfufub.

15 Ajô ete, tuka'a fomban ane mi awulu, sa ane minsusu'u mi bôt, ve ane mimfefek ; 16 mi tuka'a belane biyoñ, amu melu me ne abé. 17 Amu ajô ete nde, te boane minsusuk, ve yemane jôm nkômbane Nti ô né. 18 A mi bo'o te so'o wain, nje nzametane mam ô tii été, ve mi bo'o njalan a Nsim; 19 mi koba'an a Besam, a bia bi Zambe, a bia bi nsisim, mi yi'ane bia a lom e be Nti a minlem mienan mise, 20 kom ése a mfa'a ya jam ese mi va'an akéva e be Zambe Esaa a jôé Nti wongan Yésus Krist, 21 mi su'ane miabebien e si, wua e be nyô mbok e woñe Krist été.

Beyal A Beyôm

(Met 2:21-24; Kol 3:18, 19; I Pét 3:1-7)

22 A beyal, su'ane miabebien e si e be benyo beyôm, aval ane e be Nti; 23 amu nnôm a ne nlô ya nga, avale fe ane Krist a ne nlô kirke nyôle jé émien, a too fe Nnyii wé. 24 Ve aval ane kirke j'asuu ébien e si e be Krist, aval ete fe beyal be bo'o e be beyôm mfa'a ya jam ese. 25 A beyôm, nyeka'ane benyo beya, avale fe ane Krist a nga nye'e kirke a juu émien amu je, 26 nde ete a ne tune je a fubu je a nsôban ya mendim a mejô. 27 Nde kirke j'aye teléban asu dé étôto'o été, teke'e ayeñ nge mbot, nge jam éziñ aval ete, nalé j'aye bo mfufub a teke'e bijô. 28 Aval ete beyôm b'ayiane nye'e beyal ane menyôle mab bebien. Nyô a nye'e ngal, a nye'e émien. 29 Amu teke'e mô't a tameya vini minsône mié émien, ve jee mie a voñôlô mie, avale fe ane Krist a bo kirke. 30 Amu bi ne bibu'a ya nyôle jé.

31 " Amu jam ete nde fam j'aye li'

ésaa baa nyia a ke lat a ngal ; a

bebaane b'aye bo nsône wua."

32 Ndimba jame nyôna é ne anen, ve me m'akobô mfa'a Krist a mfa'a kirke. 33 Amu jame da, mô't ase ya be mia a nyeke'e ngal aval a nye'e émien ; ngale ke a fombô'ô na a semé nnôm.

Rev. Matthias MEYE
Secrétaire Général 1961.....

Bon A Bebiaé

(Deut 5 :16 ; 6 :6, 7, 20-25 ; 27 :16 ; Besam 78 :5-7 ; Kol 3 :20, 21)

6 1 A bon, wô'ane bebiaé benan e be Nti : amu nalé a ne zôsôô. 2 Sem'é éso baa nyua, nde ete e ne mviande ôsu é bili ngaka'a, 3 ndemben mam môé me ne ke mvo'é, ane ô ne tabe ényiñ ayab e si nyô. 4 Nalé fe, A mia beésaa, te soñane benyo bon na, be yaa : ve mi yale'e be e meleb a e ñye'elane Nti été.

Belo A Beti

(Kol 3 :22-25 ; 4 :1 ; Tit 2 :9, 10)

5 A belo, wô'ane beti benan be ne ba ya minsôn, a woñ a mfô'ôban e minlem mienan été aval ane e be Krist; 6 sa a ndomisi ane ba b'ajeñe na, bôt be yene be mvaé, ve ane bebobisaé be Krist, mi bo'o nkômbane Zambe mboan w'aso e nlem, 7 a saéane be a mbamba nlem aval ane nge mi abo de Nti, a sa bôt, 8 yemane na, mbamba jam ase mô't a bo, ja'ana a ne ôlo nge nti, a ye fe beta nyoñe nye e be Nti. 9 Nalé fe, A mia beti, bo'ane mam aval ete mfa'a wob, mi jôka'ane li'i be mvek, mi yemane na, nyô a ne Nti wob a éñwôn'an a ne e yôb été, a na, nsemane mesu me bôt ô se e be nye.

Mewosan A Abé

(Rôm 13:12; Kol 4:2-4; I Tés 5:8; I Pét 5:8, 9)

10 M'asu'ulane jô mia na, bo'an ngul e be Nti, a e éwôlô ya ngule jé. 11 Jaéane ngômesane bita bi Zambe ése, ane mi aye bo ngule ya tebe a wosan mefe'e me diable. 12 Amu bi nji juane ndum minsôn a metyi, ve bi ajuan a bejôô ya si ndône ya dibi di ; bi ajuane minkunda minsisim ya mbia be mam e mevôm ya yôb été. 13 Amu ajô ete nde beka'an ngômesane bita bi Zambe ése, ane mi aye bo ngule ya tebe be e ngame yat éyoñe ya mbia mô's; nde, éyoñ mi sondôya bo mam mese, mi aye tebe. 14 Ajô ete, teba'an, vôm mi tiñetiya benya mejôô ane meses e mengeteñ, a jaé zôsôô e tôé ane ébuta'a; 15 a éyoñ mi maneya jaé bikôndé mebo, ngômesan ya mbamba foé ya mvo'é; 16 mfa'a ya bise yôb, nyoñan ébene mbunan, nje mi aye bo ngule ya dime je mekoñe me mbia mô't ate. 17 Nyoñane fe afô'ôlô nyian a fansoñ Nsisim, nje é ne mejô me Zambe; 18 mi ye'ela'an biyoñe bise e Nsisim été a meye'elane mese a nja'an; mi momba'an mfa'a ôte a ke ôsu a mban ôse a nja'an ajô mimfufub mise, 19 a amu ajô dame fe na, ngule nkobô é veban e be ma na, nkuian m'aye kuui anyu dam, me liti ndimba jam ya mbamba foé a ayo'o nlem. 20 Amu ajô di nde me ne de éjjan me tii ngôkob ; ane m'aye liti je a ayo'o nlem ane m'ayiane kobô.

Mebatan Ya Asu'ulan

(I Kor 16 :22-24 ; Kol 4 :7-9)

21 Ve ane mia fe mi ne yem ane me né, a mam m'abo, Tikikus, mojañe wongan ya nye'an a mvolo bisaé ya buni e be Nti, a ye kate mia mam mese. 22 Me lomeya nye e be mia amu jam ete ebiene na, mi yem ane bi too, a na, a volô mia minlem.

23 Mvo'é é bo'o e be bobejañ a nye'an baa mbunan, bi so'o e be Zambe Esaa a e be Nti Yésus Krist. 24 Mvam é tabe'e e be ba bese b'anye'e Nti Yésus Krist wongan nye'an ô ne te wu.



Rev. Matthias MEYE
Secrétaire Général 1961.....